## 0.0.1 vibhangasuttam

- **0.** sāvatthiyam:
- 1. ariyam vo bhikkhave aṭṭhaṅgikam maggam desessāmi vibhajissāmi tam sunātha sādhukam manasi karotha bhāsissāmīti. evam bhanteti kho te bhikkhū bhagavato paccassosum, bhagavā etadavoca: katamo ca bhikkhave, ariyo aṭṭhaṅgiko maggo, seyyathīdam: sammādiṭṭhi sammāsaṅkappo sammāvācā sammākammanto sammāājīvo sammāvāyāmo sammāsati sammāsamādhi.
- 2. katamā ca bhikkhave, sammādiţţhi? yam kho bhikkhave, dukkhe ñāṇam dukkhasamudaye ñāṇam dukkhanirodhagāminiyā paţipadāya ñāṇam, ayam vuccati bhikkhave, sammādiţţhi.
- **3.** katamo ca bhikkhave, sammāsankappo: yo kho bhikkhave, nekkhammasankappo avyāpādasamkappo, avihimsāsankappo, ayam vuccati bhikkhave, sammāsankappo.
- **4.** katamā ca bhikkhave, sammāvācā: yā kho bhikkhave, musāvādā veramaņī pisuņāya vācāya veramaņī pharusāya vācāya veramaņī samphappalāpā veramaņī ayam vuccati bhikkhave, sammāvācā.

- 5. katamo ca bhikkhave, sammākammanto: yā kho bhikkhave, pāṇātipātā veramaṇī adinnādānā veramaṇī abrahmacariyā veramaṇī, ayaṃ vuccati bhikkhave, sammākammanto.
- **6.** katamo ca bhikkhave, sammāājīvo: idha bhikkhave, ariyasāvako micchāājīvam pahāya sammāājīvena jīvikam kappeti, ayam vuccati bhikkhave, sammāājīvo.
- 7. katamo ca bhikkhave, sammāvāyāmo: idha bhikkhave, bhikkhu anuppannānam pāpakānam akusalānam dhammānam anuppādāya chandam janeti vāyamati viriyam ārabhati cittam pagganhāti padahati. uppannānam pāpakānam akusalānam dhammānam pahānāya chandam janeti vāyamati viriyam ārabhati cittam pagganhāti padahati. anuppannānam kusalānam dhammānam uppādāya chandam janeti vāyamati viriyam ārabhati cittam pagganhāti padahati. uppannānam kusalānam dhammānam thitiyā asammosāya bhiyyobhāvāya vepullāya bhāvanāya pāripūriyā chandam janeti vāyamati viriyam ārabhati cittam pagganhāti padahati, ayam vuccati bhikkhave, sammāvāyāmo.
- 8. katamā ca bhikkhave, sammāsati: idha bhikkhave, bhikkhu kāye kāyānupassī viharati ātāpī sampajāno satimā vineyya loke abhijjhādomanassam, vedanāsu vedanānupassī viharati ātāpī sampajāno satimā vineyya loke abhijjhādomanassam, citte cittānupassī viharati

ātāpī sampajāno satimā vineyya loke abhijjhādomanassam, dhammesu dhammānupassī viharati ātāpī sampajāno satimā vineyya loke abhijjhādomanassam. ayam vuccati bhikkhave, sammāsati.

9. katamo ca bhikkhave, sammāsamādhi: idha bhikkhave, bhikkhu vivicceva kāmehi vivicca akusalehi dhammehi savitakkam savicāram vivekajam pītisukham pathamam jhānam upasampajja viharati. vitakkavicārānam vūpasamā ajjhattam sampasādanam cetaso ekodibhāvam avitakkam avicāram samādhijam pītisukham dutiyam jhānam upasampajja viharati. pītiyā ca virāgā upekkhako ca viharati sato ca sampajāno sukhanca kāyena paţisamvedeti yantam ariyā ācikkhanti upekkhako satimā sukhavihārīti tatiyam jhānam upasampajja viharati. sukhassa ca pahānā dukkhassa ca pahānā pubbeva somanassadomanassānam atthagamā adukkham asukham upekkhāsatipārisuddhim catuttham jhānam upasampajja viharati. ayam vuccati bhikkhave, sammāsamādhīti.